

錢塘遺事卷之八

武陵 劉 一清 編

張世傑入衛

乙亥三月初十日張世傑入衛京師內空賴張世傑一軍萬人自荆湖至世傑本信安歸正人擢承宣使陳宜中疑世傑易其所部之軍世傑不得盡其力時呂文福請提兵入衛文福文煥兄也

議遷蹕

宗學上書曰臣等爲國同姓與宗社相依爲命近者元臣開督視師繼而又聞逆整已斃臣等私竊喜之

錢塘遺事卷八

一

邇日以來京師內外喧傳皆得內人今已放散御船今已排定營衛諸軍皆已點差倉庫今已搬移陛下移蹕亦在旦夕躊躇未卽行者獨吾太皇太后不肯輕動爾臣竊爲陛下計不過移蹕慶元其次則移蹕平江至事勢危急則航船幸闕不思我能往彼亦能往縱使兵或可守陛下豈能鬱鬱求活作一龜茲國耶北兵渡江已踰兩月不聞有備禦之策但聞和議之請和議未必能成危亡之勢漸迫今天下勤王之兵在京屯戍者不下二十萬猶堪一戰豈束手待斃而已哉臣願陛下戒諸將帥糾集精兵盡力血戰戰

若不勝死於社稷猶可見藝祖于地下惟陛下思之
幸甚

陳宜中奏

殿院陳宜中奏云近北兵渡江已踰兩月上而三宮
下而萬姓皆謂平章賈似道督師一出未必負三朝
禮遇之恩必能以一死酬天地涵容之澤而乃擁師
逗留不發一矢今月二十日忽報孫虎臣又二十二
日報臣等以諸軍皆潰散初猶有自與一決之語既
乃發爲海上迎駕之言臣見其平日自詭以知兵意
或有深謀祕計可以救一脈于垂亡觀其所措有非

錢塘遺事卷八

二

腐儒所能測識忽二月二十八日早有督府隨吏回
歸乃言似道于二十日夜三更鳴鑼一聲回散諸軍
竄身而去莫知所之臣聞之血淚迸流欲死無由因
自痛念曩經丁大全敗竄之餘適際理宗再生之德
微逾末年似道時適當國起自書生叨居樞地彼雖
一出臣每見其施行時有差舛未嘗不從容納規而
才弱力薄凡莫能教正如范文虎事爭之不力稔禍
今日涕殞何追今似道以潰師竄身上誤宗社臣曩
爲臺諫旣無呂誨之先見臣今爲執政又不能爲社
稷力爭罪何所逃謹自具劾以聞欲望聖慈重行追

竄正平日苟容之罪以謝公論仍乞正似道誤國之罪以謝天下祖宗德澤未衰人心戴宋猶故元氣一脈尚可挽回仍乞將公田市舶茶鹽等拂民所欲者悉賜改正令學士院降詔以明太皇太后陛下哀痛悔恨之意少回皇天舍逆助順之心

陳宜中都督

陳宜中都督軍馬時乙亥四月也奉旨建督于京檄召諸路軍馬勤王并令潰軍各歸所部淮東隸李庭芝淮西隸夏貴沿江隸汪立信四川隸朱禕孫江西隸黃萬石節制團結內外兵十七萬五千人分廂差

錢塘遺事卷八

三

寄居官爲總督給一軍赴教場教閱

詔諭三將

五月太皇太后詔諭呂文煥等息兵通好詔曰賈似道專制朝政十有五年挾智行私矜已自用結怨軍民失信隣國戰功當賞而不賞邊費當支而不支盡心力以守襄城者坐視不救備已財以贈郢兵者反受責言遂使諸將離心三軍解體比者請師出督畏死偷生不戰而逃莫知所在自古失律之師未有如此之謬者吾已節次明正其罪但念吾年七十抱病滋久嗣君幼冲煢煢在疚念北方之兵薄吾近地宗

社危急不可以一朝居似道召禍如此老身幼主實受其殃因思爾文煥世受國恩久當事任守城備殫勤勞爾奔爾文虎皆受先朝之知嘗任巖帥之寄一時捨此度非本心三人在北豈能遽忘本朝之舊不念吾國之危茲用手披敷陳吾意爾三人爲吾轉道此意於師相吾老幼雖不足念生靈何辜受此荼毒不知何道可以息民何辭可以通好於北朝以成南北之美意以紓社稷之近憂願亟爲我圖俾王室不壞理宗度宗在天之靈亦必降於爾衷故茲詔示想宜乎悉

錢塘遺事卷八

四

呂文煥回本國書

報國盡忠自許初心之無愧居城守難豈圖末路之多差茲祈轉念昔日之功庶可少伸今日之款明公問信歸人欲言伏念某少服戎行壯臨邊徼干戈滿眼輕性命於鴻毛弓箭在腰繫死生於馬足不但馳驅于西北誓將屏蔽于東南幸以微勞屢收薄效至若襄城之計最爲淮甸之危蠢茲無厭之戎指爲必攻之地迅裂如水火之衝擊飄蕩如風雨之去來坐一日以猶難居九年而可奈南向高築蓋欲拒吾喉襟樊城盡屠又已去我羽翼雖劉整首先于犯順而

焦然中苦於黨姦孤城其如彈丸謂靴尖之踢倒長江雖曰天塹欲投鞭而斷流兇焰如斯先聲屢至臣能死爾仰天而哭伏地而哀敵旣深乎析骸而爨易子而食尙冀廟堂之念我急令鄰郡之聚兵委病痛于九年之間投肌膚于羣虎之口因念張巡之死守不如李陵之詐降猶期後圖可作內應國手敗局甯著豈異尋常之機俗眼據圖觀形寧識驪黃之馬蓋使忠臣偶陷于敵國烏能絕意不念于鄉閭固知死也何補于生奚益安有食焉不在其事因銜北命乃擁南兵視以犬馬報以仇讐非曰子弟攻其父母不得已也尙何言哉今我皇上寬其好生開以自新之路明公都督雖是問罪藹然念舊之情安敢固違永爲背叛見今按兵不動卧轍不驚撫此良辰伏觀景命且秦穆公之赦殺馬在野人猶知報恩如齊威公之相射鉤願君子終無忌怨

督府檄文

略曰且整之叛我也固以自疑若煥之去國也獨何不忍不思元溫羣從並受卵翼之恩李陵一門初無毫髮之損國家厄運一至于此人心忠義夫誰無之太皇后七秩之聖躬今天子孤惇之沖質在人情尤

知恤鄉閭之老幼矧臣子忍坐視君父之傾危寧無
郡國賢臣亦有江湖豪傑共會倡義之旅載馳勤王
之師如陶士行慷慨之真如張魏公忠赤之至救日
之弓拔月之矢使直指于旌旗如礪之山如帶之河
尚永堅于盟誓

王爚平章

乙亥四月王爚平章軍國重事八月王爚致仕爚具
位平章在朝無所建明不顧君父之顛危退爲保身
存家之計鄙哉

日蝕

錢塘遺事卷八

六

乙亥六月初一日午時日有食之既是時天地晦冥
咫尺不辨人雞鶩歸猶如暮夜自巳至午其明始復
下詔曰天降罰于我家嗣君幼冲未堪多難吾以衰
髦勉強聽政明不能察姦臣之誤國仁不能救兵革
之殄民德澤弗流政令多失乖氣致異謫見于天迺
夏季月朔日有食之既陽微晝晦變莫大焉吾惟艱
危之會憂心如熏重以災異謫告于何不臧憂咎在
吾痛自先責貶損尊號猶恐未盡應天之實方與嗣
君夙夜祇懼省躬悔過慨念姦臣專政之久杜塞言
路蒙蔽天變下情壅于上聞禍至此極今吾當儆悟

少知懲艾虛心聽政惟人言是聽以答天意咨爾百僚士庶盡忠極言凡涼菲之愆政事之疵黎元之疾苦爰暨修禳固圉之常策可以消厄運導和氣者毋有所隱將採擇施行人心悅而天怒解庶幾在此布告中外體吾至意時太皇太后內批痛自切責以答天戒可去聖福二字用昭吾恐懼脩省之意

陳畱並相

乙亥六月陳宜中左丞相畱夢炎右丞相陳文龍黃鏞僉書樞密院事謝堂鎮撫使家鉉翁知臨安府授文天祥刑部尙書趨赴行在命夏貴淮東制置知揚

錢塘遺事卷八

七

州朱煥淮西制置知廬州召李庭芝赴行在夏貴不受代李庭芝閉門自守

文天祥入衛

乙亥四月文天祥爲江西提刑募兵於贛州台州杜澣糾合四千人從之至九月天祥將吉贛民人及峒丁二萬人入衛衣裝器械戈甲精明人心喜慰詔褒獎除江浙制置使知平江府提兵捍禦是時陳宜中歸永嘉畱夢炎當國夢炎意不相樂乃以天祥爲制閩出守吳門

徵諸帥不至

徵呂文福入衛行人失辭文福自疑不至復徵夏貴
督萬壽黃萬石入衛並不至時京城招軍年十五以
上號武定軍長不滿四尺觀者寒心

諸郡望風而降

乙亥三月知江陰軍鄭濡道遁去知廣德軍令狐
降之三月十四日下平江府守臣潛說友遁通判胡
玉以城降焉下安吉州守臣趙與立降江上列城或
降或遁無一人堅守者夏四月下江陵府高達京湖
名將已未解圍鄂州似道許以建節後竟不與達怨
望久矣至是爲荆湖制置以城降宣闕不能制城初

錢塘遺事卷八

八

陷朱禩孫仰藥不得死旣而亦降焉乃合朱禩孫移
文諸州歸附旣鼎州澧州常德府壽昌軍並降時大
兵徇湖南圍潭州安撫李芾與大兵戰于澧陵得捷
守城攻之不能克九月大兵至獨松關殺廉萬戶希
賢後丙子二月廉希賢之子殺漲濡磔之濡張俊之
曾孫也十一月十六日大兵下隆興府劉槃以兵累
戰不利遂以城降牛溥危天順二將赴火死初瑞州
先下姚計議至隆興說降劉槃拒之乃引兵出戰殺
戮不少凡累戰不利不得已而以城降焉大兵至撫
州時制置黃萬石開闢撫州聞大兵至而遁都統密

侑迎敵就擒不屈嚼舌罵聲不絕而死施至遣以城
降焉建昌相繼而下宋師戰于相關敗績去杭百里
時獨松關告急召文天祥入衛天祥自吳門還遣守
獨松關時天祥軍三萬張世傑軍五萬諸路勤王師
猶有四十餘萬天祥與世傑密議今兩淮堅壁閩廣
全城王師且眾何不與之血戰萬一得捷則罄兩淮
之兵以截其後國事猶可爲也世傑大喜遂議出征
獨宜中沮之事不成矣二十八日進攻平江府通判
王矩之以城降十二月大兵屯平江府巴延在焉京
師戒嚴雷夢炎陳文龍黃鑪劉黻並遁去大兵屯于

錢塘遺事卷八

九

長河堰陳宜中蒙蔽外庭如遣使請和見伯顏于長
安堰已而不如約故大兵竟至皋亭山下丙子正月
大兵入臨江軍權守滕巖瞻遁臨江告急吉州乞兵
援守吉州差禁軍三百人至臨江防拓舟必從吉水
敢勇軍守吉水陸必從永豐忠勇軍守永豐未幾大
兵至禁軍潰散大兵入臨江大兵更自相江疾馳至
吉州城下寨十八日大兵進皋亭山去城三十里北
使請執政軍前議事文天祥請行百姓官民迎丞相
伯顏于皋亭山下十九日大兵進屯北關門外京城
百姓門上各貼好殺拜三字呂文煥范文虎九騎入

城遂入大內謁太皇太后

納降表

乙亥十二月遣使納降表直學士高應松辭草表乃以京局官劉褒然權直院草之自賈似道喪師後至今十月餘國事危急將士離心兵出屢劾朝廷方理會科場明堂等事士大夫陳乞差遣士人覬覦恩例一籌不畫及是束手無措乃議納土求封爲小國賫降表奉使燕京哀哉

詔罷兵

宋太皇太后詔文天祥罷兵詔曰卿之忠義朕已素

錢塘遺事卷八

十

知見今遣使請和卿宜自靖自獻慎勿生事乃所以保全吾與嗣君也天祥捧詔號泣于是不敢出師矣

罷團結

乙亥十二月宋太皇太后詔民兵罷團結既太后詔南北講和京城內外民兵罷團結三省榜諭京城百姓兩宮仁慈保全生靈南北見議講和毋致惶惑

二王航海

丙子正月十二日命秀王與擇奉皇兄廣王昰皇弟益王昚出宮航海

宜中夜遁

陳宜中十月再相國事亦危矣至丙子正月十八日
大兵至皋亭山要以相見宜中夜遁十九日以賈餘
慶爲右丞相吳堅爲左丞相謝堂樞密使家鉉翁參
知政事劉岳同知樞密院事是時宜中遁文天祥辭
右相不拜遂以賈餘慶爲右丞相朝廷愈无統矣

文魁辭相

丙子正月十九日除文天祥右丞相兼樞密使天祥
辭不拜除資政殿大學士北師邀當國者相見執政
侍從交贊公出天祥曰國事至此吾不得愛身辭相
印不拜以資政殿學士行天祥至皋亭山巴延丞相
引見天祥抗辭慷慨議論不屈遂留之不使南歸遣
王千戶館伴

京城歸附

丙子正月二十日大兵入臨安府請太皇太后降太
后詔江南諸郡歸附詔云今根本已撥諸城雖欲拒
守民何辜焉詔書到日其各歸附庶幾生民免遭荼毒
時賈餘慶令學士院降詔俾天下歸附之各付一省
劄惟家鉉翁不肯署押吳堅一如賈餘慶之命程鵬
飛作色欲縛鉉翁鉉翁云中書無縛執政之理歸私
廳以待程竟不敢誰何也朝廷自乙亥十二月至丙

子正月信使往來和議未決正月二十四日北使請
宰執親往燕京朝覲于是以吳堅賈餘慶家鉉翁劉
岳文天祥五人爲祈請使朝廷百官或在或遁至是
爲之一空矣二月初一日巴延丞相指揮收京城軍
器至十二日索宮女內侍樂官諸色人等宮人赴蓮
池死者甚眾二十日北使請三宮北遷二十二日宋
少帝合太后隆國夫人黃氏朱美人王夫人以下百
餘人從行福王與芮參政謝堂高應松駙馬都尉楊
鎮臺諫段登炳鄒琪陳秀伯知臨安府翁仲德等以
下數千人太學宗學生數百人皆在遣中惟太皇太

錢塘遺事卷八

三

后以疾畱大內

潭州死節

丙子正月大兵破潭州李芾守潭竭力備禦凡八九
月其間出戰屢捷而大兵之攻日增芾不能支城破
之日命積薪樓下於是攜家人盡登樓大宴積金銀
于兩畔李與館客上坐其餘列坐左右數盃後命喚
二劊子來旣至則令將此金銀去與你家口取法刀
來一不肯受一會意徑受之攜去分付家人後須臾
將法乃至李帥呼之至前分付先從頭殺人到尾殺
我待我點頭時下手復飲酒良久點頭惟館賓與一

妾墜樓而走妾折一足最後李帥伸頭受刃此劊子
遂四面放火自刎其腹而死既潭州陷衡州茶陵軍
袁州相繼而下其後李兩山有詩題潭州驛懷李肯
齋曰天運由來有廢興義無兩大一身輕封疆社稷
若不死婦女鬚眉何用生紐解網常重接續灰寒萬
劫獨光明便當配食三閭廟啟迪民彝開太平三閭水死
肯齋火死

吉州歸附

丙子二月十五日大兵至吉州權城守周天驥以城
降大兵循浙東至嚴州知州方回降至台州知州楊

錢塘遺事卷八

三

必大降至處州知州梁信降衢婺等州並下

揚州死節

丙子五月廣王登極除李庭芝爲右丞相六月庭芝
棄揚州引兵至泰州欲航海至福州大兵追及之庭
芝凡戰數合大敗遭擒宋都夕元帥斬庭芝于軍前八
月大兵攻淮東破揚州朱煥以城獻姜才死之姜才
淮之猛將前後主將皆其人也姜才屢戰大捷大戰
三日姜才身生九疽不可掛甲遂敗至泰州被執不
肯降臨刑含血罵聲不絕口淮人言之無不傷歎
錢塘遺事卷之八畢